

**Wajah segar MCA bagi tumbang 'orang kuat' DAP**  
**MalaysiaKini.com**  
**March 19, 2012**  
**By Lee Way Loon**

MCA dijangka membariskan senarai calon muda untuk merampas kerusi-kerusi 'hangat' pada pilihan raya umum akan datang.

Sumber yang rapat memberitahu Malaysiakini bahawa berkemungkinan satu pertiga daripada calon yang akan diketengahkan terdiri daripada wajah-wajah muda yang segar.

kak tunda mca jessie ooiSumber dari MCA Selangor mendedahkan bahawa jawatankuasa perhubungan negeri itu telah menyerahkan senarai calon untuk diteliti oleh kepimpinan pusat mereka dan keputusannya dijangka diketahui menjelang bulan depan.

Adalah difahamkan bahawa antara mereka yang dicalon oleh MCA Selangor adalah ketua Beliawanis Selangor Jessie Ooi, timbalan ketua Beliawanis Pusat Nicole Wong dan ketua kelab pidato MCA Bahagian Cheras Steve Teoh.

Di sebalik pengalaman memalukan semasa siaran langsung di televisyen semasa perbahasan MCA-DAP bulan lalu, Ooi difahamkan mendapat sokongan daripada pemimpin-pemimpin tertinggi parti itu.

Sumber itu, berkata beberapa pemimpin percaya kesilapan kecil yang dilakukan oleh Ooi itu sebenarnya membawa kelebihan kerana beliau kini lebih dikenali di kawasannya di Selayang, berbanding dengan penyandang ahli parlimen sekarang.

mca nicole wongSeperti Ooi, Wong (kiri) dan Teoh juga dilatih untuk berdepan dengan masyarakat dan menjalani latihan berucap di khalayak ramai. Mereka juga ditugaskan mendekati masyarakat di kawasan masing-masing - Selayang, Seputeh dan Cheras - untuk beberapa waktu.

Presiden Kelab Pidato MCA, Tan Jui Thong, ketika dihubungi, berkata sebilangan besar calon yang dijangka dipilih adalah dari ahli kelab itu manakala sumber lain pula berkata, sekurang-kurangnya 10 ahli kelab berkenaan telah dicalonkan.

Selain itu, MCA juga dijangka meletakkan tokoh masyarakat terkenal walaupun mereka tidak mempunyai latar belakang politik, meskipun pada hakikatnya bahawa usaha seumpama itu gagal pada tahun 2008.

Sebagai contoh, personaliti TV, Victor Gu dibawa bertanding di kerusi Damansara Utama, yang dianggap kawasan yang agak selamat, namun beliau dikalahkan teruk oleh calon dari DAP.

mca chew hoong lingBagi pilihan raya akan datang, satu nama yang disebut-sebut adalah pengacara profesional dan penceramah motivasi Chew Hoong Ling.

Chew (kanan), 32, mendapat publisiti meluas apabila beliau menderma 60 peratus daripada hatinya pada tahun 2009 kepada seorang remaja yang menghidap kanser yang tidak dikenalnya.

Spekulasi adalah bahawa MCA bercadang meletakkan beliau sebagai calon berpotensi di Petaling Jaya Utara bagi menumbangkan orang kuat DAP Tony Pua.



